

Na osnovu člana 30. stav (1) tačka a) i stav (2) i člana 31. Zakona o plaćama i naknadama u institucijama Bosne i Hercegovine ("Službeni glasnik BiH", br. 50/08 i 35/09), člana 30. stav 2. i člana 50. stav 1. Zakona o radu u institucijama Bosne i Hercegovine ("Službeni glasnik BiH", br. 26/04, 7/05 i 48/05) i člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine na 91 sjednici, održanoj 17. juna 2009. godine, donijelo je

ODLUKU

O NAČINU I POSTUPKU OSTVARIVANJA PRAVA NA NAKNADU ZA GODIŠNJI ODMOR I PLAĆENO ODSUSTVO U INSTITUCIJAMA BOSNE I HERCEGOVINE

Član 1. (Predmet Odluke)

Ovom Odlukom uređuje se način i postupak ostvarivanja prava zaposlenih u institucijama Bosne i Hercegovine na naknadu za godišnji odmor i plaćeno odsustvo, u skladu sa članom 31. Zakona o plaćama i naknadama u institucijama Bosne i Hercegovine, članom 30. stav 2. i članom 50. stav 1. Zakona o radu u institucijama Bosne i Hercegovine.

Član 2. (Pojam plaćenog odsustva)

(1) Pod plaćenim odsustvom, u smislu člana 31. Zakona o plaćama i naknadama u institucijama Bosne i Hercegovine, podrazumijeva se odsustvo s rada na osnovu: stupanja u brak, porođaja supruge, teže bolesti ili smrti člana užeg domaćinstva i u drugim slučajevima koje utvrdi Vijeće ministara podzakonskim aktima.

(2) Članom užeg domaćinstva, u smislu stava (1) ovog člana, smatra se: bračni i vanbračni supružnik, dijete (bračno, vanbračno, usvojeno, pastorče i dijete bez roditelja uzeto na izdržavanje), otac, majka, očuh, maćeha, usvojlac, djed i baka (po ocu i majci), brat i sestra.

Član 3. (Visina naknade)

Zaposleni u institucijama Bosne i Hercegovine ima pravo na naknadu za vrijeme godišnjeg odmora i plaćenog odsustva u visini svoje neto plaće iz prethodnog mjeseca izuzimajući novčanu nagradu i naknadu na osnovu obavljanja poslova drugog radnog mjesta.

Član 4. (Obračun i isplata naknade)

Obračun i isplata naknade za godišnji odmor i plaćeno odsustvo, u slučajevima odsustva sa posla po ovom osnovu, za zaposlene u institucijama Bosne i Hercegovine vrši se uz mjesečni obračun i isplatu plaća i naknada zaposlenih u institucijama Bosne i Hercegovine na osnovu pojedinačnih rješenja o korištenju godišnjeg odmora, odnosno plaćenog odsustva.

Član 5. (Institucije odgovorne za provođenje Odluke)

Za realizaciju ove Odluke zadužuju se institucije Bosne i Hercegovine i Ministarstvo finansija i trezora.

Član 6. (Stupanje na snagu)

Odluka stupa na snagu narednog dana od dana objavljivanja u "Službenom glasniku BiH".

VM broj 166/09
17. juna 2009. godine
Sarajevo

Predsjedavajući
Vijeća ministara BiH
Dr. **Nikola Špirić**, s. r.
